



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

tiryimiyim@aolima

tir yimiyim

TAPAK 10

PM Modi-i September 27 nü PM-DHM mission tenzüksütsü

Indian Wells nung Naomi Osaka masayatsü



VOL. XVIII NO. 342 (ADOK 342) DIMAPUR

ROGONÜ (FRIDAY)

RONGJUI (SEPTEMBER) 24, 2021

₹ 5.00

## Nagaland nung COVID-19 agi meneper nisung 30,000 alemogo

**Kohima, Rongjui/Sept. 23 (TYO):** Bresthibarnü COVID-19 cases tasen 37 dak jangjatetba sülen Nagaland nung iba tashidak agi meneper nisung 31,000 alemogo.

"Tanü positive cases 37 putetba ya Dimapur nung 18, Kohima nung 10, Mokokchung nung asem, Tuensang nung ana aser Kiphire, Longleng, Phek aser Wokha nung kaka alitsü," ta State Nodal Officer for Integrated Disease Surveillance Project, Dr Nyanthung Kikon-i anogoshi COVID-19 osang sangdongba mapang ashi.

Paisa tesüiba ghonda 24 tsüngta iba tashidak nungi taneptsü angur 22 liasü, aser itemji Dimapur nung 16, Kohima nung asem, Mokokchung, Phek aser Tuensang nung kaka alitsü, ta ashi.

Ajak ya senteper state nung caseload 31,027 ajunger aser taneptsü angur nisung 28,935 alitsü, ta pai ashi.

Taneptsü anguba rate ya shilem 93.25 alitsü.

Tang state nung COVID-19 active cases ya 467 lir aser item rongnung nisung 90 dak coronavirus tashidak agi timtem agütsüba sümia lir, nisung trok tera timtema oxygen nung lir, nisung tenet kanga kangshia oxygen nung lir, nisung pezü ICU nung ventilator maden lir, nisung asem ventilator nung aser nisung 356 dak iba tashidak agi timtem

agütsüba mali, ta pai ashi.

Dimapur district nung nisung ana asüba ajanga state nung iba tashidak keter asür nisung 660 jungogo aser item rongnung nisung 15 dak danga tashidak keta liasü, ta Dr Kikon-i ashi.

COVID-19 tashidak agi menepa alir nisung 965 danga state temi ogo, ta pai ashi.

Tang tashinung COVID-19 tashidak alitsü südi ta temolung melemi Nagaland nung sample 363,761 tendangogo. Item ya RT-PCR ajanga 108,463, TrueNat ajanga 81,656 aser Rapid Antigen Test ajanga 173,642 tendangogo, ta Dr Kikon-isa ashi.

Bodhbarnü tashinung Nagaland nung nisung 681,007 nem COVID-19 vaccine doses 10,03,197 agütsüogo, ta State Immunization Officer Dr Ritu Thurr-i ashi.

State nung iba mozü agir alirtem ya frontline nung inyaker nisung 60,918, healthcare nung inyaker nisung 15,994, arishi küm 45 tema nisung 196,910 aser arishi küm 18 nungi 44 tsüngta nisung 407,185 alitsü, ta pai ashi.

Nisung 322,190 nem vaccine dose tanabuba agüja parnok iba vaccination course tembangogo. Parnok ya frontline nung inyaker 46,975, healthcare nung inyaker 13,223, arishi küm 45 tema nisung 130,901 aser arishi küm 18 nungi 44 tsüngta nisung 131,091 alitsü, ta Dr Thurr-isa metetdaksü.

## CS kübok Agri & Allied Dept. indang SLSC senden amen

**Dimapur, Rongjui/Sept. 23 (TYO):** Agri & Allied Departments pur 2021-22 atema State Level Sanctioning Committee pur senden ka Nagaland Chief Secretary, J. Alam, IAS lenisüba kübok mena liasü.

Iba senden ya Secretariat Conference Hall nung September 23, 2021 nü amen, kong Agri & Allied Department tem nungi AHODs, HODs aser Missions tem ajunga dena liasü.

Iba senden nung recommendation aser approval atema Agri & Allied Department indang tongtipang scheme - RKVY, PMKSY, MOVCD-NER aser NFSM, ATMA, NMSA, SMAM, NMEO amala CSS tem benoka jembia liasü.

State nung nütsüing yongsük shilem 60 dak tema aluyimba aser sendaktepa aliba sector nung metaloka lir, aser Nagaland nung COVID-19 tashidak wara den tsünglu ajema arua aser tsünüsempongsü achiba mesen pokteta lia Agri & Allied

Departments ajanga tongti shilem agiba atema pelar, ta SLSC indang mendenpubai ashi.

Iba ama tensa tamajungdang Agri & Allied Department ajanga shilem tajung agiba atema pai ketdangsür nem tenüngsang agütsü aser ano maneni amalitep akatsü ayongzük aser aluyimer ajangzüksü atema Department tem dang senotsü timi amshitsü ajungshia liasü.

Iba senden nung Agriculture Production Commissioner, Nagaland aser SLSC Vice Chairman Y. KikhetoSema, IAS ajanga züngsemtem dang nungdabapur nem teyari balaka agütsütsü ajungshi aser district officer tem dang nübürtem nem oset shidak agütsütsü ayongzüka liasü.

State nung COVID-19 tashidak wara den alu nung tsüngsarusa tia ajurua lir, anungji Agri & Allied Department tem atsükshia melie aluyimer ajangzüksü atema lungjemer inyaksüla, ta ayongzüka liasü.

## AB-PMJAY agi March 2022 tashinung kilen shilem 70 awajemtsü



*Ayushman Bharat - Pradhan Mantri Jan Aarogya Yojana (AB-PJAY) sentong tenzükür küm asem ajungba sentong ka Kohima nung September 23, 2021 nü agiba nung Minister, Health & Family Welfare, Pangnyu Phom-i jembidang tangokba noksa ka yangi angur.*

**Kohima, Rongjui/Sept. 23 (TYO):** Nagaland nung kilen lakh 2.33 dak tema aliba nungi Ayushman Bharat - Pradhan Mantri Jan Aarogya Yojana (AB-PJAY) ajanga March 2022 tashinung kilen shilem 70 awajemtsü.

AB-PMJAY sentong tenzükür küm asem ajungba nungtem nung sentong ka State Health Agency, Department of HFW Nagaland ajanga Hotel Vivor, Kohima nung ayongzüka agidang iba osang ya Minister, Health and Family Welfare, S Pangnyu Phom-i metetdaksü.

Iba sentong ya linük ajunga nung Ato Kilonser Narendra Modi-i 2018 küm tenzüksü aser Nagaland nunga iba scheme kübok kilen 2,33,324 zülüoka lir, saka September 22, 2021 tashinung shilem 41.2 (96,027) dang awajema lir, ta pai ashi.

Iba atema department-i State Health Agency ajanga Aapke Dwar Ayushman sentong kübok March 2022 tashinung kilen 1,63,329 (shilem 70) awajemtsü, ta Minister-i sangdong.

Iba scheme amenokba sülen

tanü tashinung mozü kidang temang anepalur nisung 20,000 shi yariogo aser sen crore 26 shi menoktsüogo, ta pai ashi.

Iba maparen inyaksü atema National Food Security Act (NFSA) data den lungjemdakja Aadhaar amshia yanglua aliba Ration Card tem PMJAY portal nung sendakteptsü, anungji tenüng zülüokba aser nübür awajemba tsütsü tajungba akumtsü, ta Minister Phom-i ashi.

Iba scheme indang awareness prokshitsü atema Nagaland State Rural Livelihood Mission (NSRLM) ajanga State Health Agency PMJAY den külemi inyaksü aser block data operator ajanga E-card yanglutsü, ta ashi.

Department of Labour kübok tenüng zülüoka aliba ki-o-jen aser danga Construction Worker tema iba scheme nung adentsü aser state nung kibong tasen 8584 bendenloksü, ta Minister-i ashi.

Health Benefit Package 2.1 mapa kuma inyakba nung Nagaland ya state mezüngbuba lir, kong taküm nungi organ transplant (Kidney Transplant)

packages densemstü aser iba scheme kübok speciality 26 nung treatment procedure 1664 lir, ta Minister Pangnyu-i ashi.

Kasa sentong nung Principal Secretary Health and Family Welfare, Amardeep Singh Bhatia-i jembiba mapang, iba scheme yagi makamaiter temi nungdaka aliba teyari agütsür, ta ashi.

Iba anogomung tenüng nung state tesem ajungalen Ayushman Bharat Fortnight sentong ayongzüka agiogo, ta pai ashi.

Ayushman Bharat ya Central sorkar indang flagship programme ka lir aser component ana - National Health Mission kübok primary healthcare atema Health and Wellness Centres aser secondary aser tertiary atema PMJAY health insurance lir, koba agi küm shia kibong ka nem sen lakh pongu tashi indang temang anepalur.

PMJAY nükjidong ya 2011 census nung ajemdaker makamaiter aser tajemzükba jenjang nung alirtem nem temang anepaluba mapang senotsü indokba ajemdaksütsü lir, anungji parnok temang anepaluba nung sentsüh malitsü, ta pai ashi.

Nagaland nung iba scheme amshiba mozüki aser health centre 98 lir aser item rongnung nija mozüki 14 lir, aser iba card alirtemi linük tesem ajungalen züngoka aliba mozüki nungi kasa teyari angutsü, ta Bhatia-i ashi.

Iba scheme nungi teyari agirtem rongnung Khekiye aser Y Watimongba nati parnoki ajangshiba lemsatapa liasü.

Iba sentong nung Technical Consultant (PwC) Alongla Aier menden liasü aser Joint Director and State Nodal Officer AB-PMJAY, Dr Kika Longkumer ajanga melepzüng o jembia liasü.

## UDA-i jembiba ama inyaksüla: JDU Nagaland

**Dimapur, Rongjui/Sept. 23 (TYO):** Naga Political Issue ya joko Naga National Political Groups (NNPGs) mesüra National Socialist Council of Nagalim (Isac/Muivah) kabu nung mali ta angateter, ta Janata Dal United sangdong ka ajanga ashi.

Ken o jembishinü tembangogo aser NNPGs aser GOI tsüngta 'charter of agreement' züluteptsü atema Government of India (GOI) tajaba atar, ta NNPGs ajanga mapang shia jangja-jangja shia arur.

NSCN (IM) yabo Flag aser Constitution melira solution malitsü tangatetba nung lir ta ajaki kanga jangja meteta lir. Anungji

yangji ajemdaker Naga Political Issue jenjang mejangjaba mali, ta sangdong ajanga ashi.

Ibaji GOI indang court nunga tejangja lir. Iba ama tensa nung tang tasen tentetba United Democratic Alliance ya pei sasa pei mürektetsü tebilemba nung Nagaland nung Naga National Group balala ajurua senzütsü menüngdak, ta Janata Dal United, Nagaland ajanga ashi.

Parnoki Nagaland animesotsü atema temolung agütsütsüla aser GOI kisüng masü saka political party balala nem iba Naga Political Issue angatetdaksütsüla.

GOI ajanga iba ken o tajungtiba nung bentet-ratet mesütetra parnok tejashiba

sayutsü atema temai adoktsü renema alitsüla. Union Territory of Delhi atema Delhi Chief Minister Arvind Kejriwal aser par cabinet temi Delhi Lieutenant Governor kima Dharna ayongzüka katetra, Naga Political Issue ya Kejriwal-i nokdakba dang kanga agi tuluba lir, ta sangdong ajanga ashi.

UDA-i mapang shia opposition maliba sorkar tenüng nung sangdongba ya shidakba asünungbo, parnoki akangakanga molungteter inyaksüla. UDA tentetba ya otsü tasen ka süaka, parnoki jembiba ama meinyaktetra/melitetra, amajok asütsü, ta Janata Dal United, Nagaland ajangasa ashi.



## MULUNGNEN O

Kü shi aser kü mulungi tamakok nguaka,  
saka teti Tsüngrem kü mulungjang tashi aser shilem lir.  
Tenüngsang Ken 73:26

## HELEN

5<sup>TH</sup> SEPT. 1965 - 17<sup>TH</sup> SEPT. 2021

Onoki kanga tang meima aliba Ojala Asür Helen ajungbena 17<sup>th</sup> September 2021 nü iba akümli wadang tembanger onok mulungzürep tia nung aliba mapang kiyong kidanger, medemsortem, Arogo, kinunger aser temulungertem shirnokisa ozü den sarasadem, shisatsü, nübu aser rongsen agi nungeta yariogo nenok ajak dang kangasa pelaba lemsateper.

Nenok mapa tajung onoki kodanga mamadoktsü. Asen teyanglur Tsüngremi nenok teti moajangma.

Temeim Kinungbu, Jabaso aser Kinungertem.

## Athuan Abonmai tepsetba Naga Hoho-i aitsür

**Kohima, Rongjui/September 23 (TYO):** Naga nunger lokti tentet balala telongjem asoshi küm aika inyaktepa aruba mapang ka nung Naga nunger yongtsü nung azütokshitepba osang angazükba ya taoksatsüka aser kanga taia maka, ta Naga Hoho media cell sangdong ka ajanga metetdaksü.

Ken o kechi südir süang, taoba "Zeliangrong Baudi (AMN)" tir asür Athuan Abonmai tepsetba ya tasümaiter inyakyim aser

nüburtem ajaki aitsütsü langa lir. Asenok yongtsü nung mangatetep kechisa lidir liang, nisung tepsetba jagi ken o kecha mebenetetsü. Khristan yimsü tesayuba nung Tsüngremi meimchir ajak pa mesükba nung yanglu aser taküm agütsütsü aser agitsüji pa kabuma nung lir ta amangba ama onoki meimchir taküm kaji kanga senti aser Khristan tamangba yimsü nung taküm ka asüngteta alitsüji kanga tongtibang ta amanger.

Yimden yimsüsüba tsütsü

lokti tentet ajaki nüburtem tejangraba akhümsübuttsü mamatsüla aser azütokshiba, nisung pur aoba aser nüngdakba makaba nung nüburtem haronghajiba nungi pilaa alitsüla. Tarutsü tajungba ka asoshi lemdanger aliba lokti takaratiba nung longjemtsü nüngdaker. Naga Hoho-i yimden yimsüsüba tsütsü lokti tentet ajak dak azütokshiba lenmang toktsür yimjung asoshi longjemer inyaksü ayongzüker, ta kasa sangdong ajanga metetdaksü.

## Govt. colleges Principals conference tenzükogo



Department of Higher Education-i ayongzüka Government Colleges Principal tem conference den repsema training sentong September 23 nü Directorate of Higher Education, Kohima conference hall nung tenzükogo.

**Dimapur, Rongjui/September 23 (TYO):** Department of Higher Education-i ayongzüka Government Colleges Principal tem conference den repsema training sentong September 23 nü Directorate of Higher Education, Kohima conference hall nung tenzükogo.

Conference den repsema training sentong ya "Envision, Inspire, Excel" omen nung ajemdaker August 23 aser 24 nü agitsü.

Lokti pelaa agizükba o jembiba mapang Commissioner & Secretary, Higher & Technical Education, W. Honje Konyak-i, department-i sentong tajung ayongzüka atema parnok nem tenüngsang agütsüba den iba sentong ajanga ajakna tali

bendanga agütsüshitsü imlaba lemsatep.

Pai, Principal tem ya tesayur dang masü saka parnoki department aser sorkar tenung nung nokdaker aser parnok inyaksangshi ajanga department aser sorkar inyakyim sayur, ta ashi. Paisa, parnok dang parnok tawabangba kübok aliba tesemtem nung temzüng ozüng shidak benoka inyaksangshitsü ajungshi.

Lokti tarutsü jenjang yangluba nung parnoki tongtibang shilem ka agir ta shia Honje-i principal tem dang parnok khuret tali angatetsü ayongzüka liasü.

Mezüngbuba anogo training sentong nung shisalen agütsürji Sr. Accounts Officer

Department of Education and Department of Health & Family Welfare, Zubenthung Murry liasü, shibai "Training on Accounts and role of DDO" onük nung ajemdaker jembiba. Tanabuba anogo shisalen agütsürji Department of English, Nagaland University Prof. N. Das aser GoN, Department of Economics & Statistics under Secretary R. Andreas na asütsü. Tenati "API Assessment" aser "Office procedures" onük nung ajemdaker jembitsü.

Mezüngbuba anogo sentong ya Commissioner & Secretary, Higher & Technical Education, W. Honje Konyak lenisüba nung agi aser tepela anküp o Director Higher Education, Dr. Apeni Lotha-i jembiba liasü.

## Union Minister G. Kishan-i State Soil Testing Laboratory semzüktsütsü

**Dimapur, Rongjui/September 23 (TYO):** Minister Tourism, Culture & DoNER G. Kishan Reddy-i September 24 nü 3:40 ako nung Directorate of Soil & Water Conservation nung State Soil Testing Laboratory semzüktsütsü. Iba Laboratory ya NEC Ministry of DoNER-i senotsü teyari agüja yangluogo.

Iba sentong nung Minister Planning & Coordination, Land Revenue Parliamentary Affairs Neiba Kronu-ia shilem agitsü. Laboratory semzükba sentong ya Commissioner & Secretary Soil & Water Conservation K. Libanlung Lotha IAS lenisüba nung agitsü renema lir.

Kasa mapang nung Union Minister, Tourism, Culture and Development of North Eastern Region (DoNER), G. Kishan Reddy-i, September 24 nü 2:30 ako nungi tenzüka Hotel Japfü, Kohima nung Planning & Coordination Department aser Ministry of DoNER kübok scheme balala benoka inyakba department tem den lepa repringshiba senden ka amentsü.

Administrative Heads of Departments aser scheme balala benoka inyakba department tekolak ajak dang iba senden nung jangrabangra arua shilem agitsü metetdaksüogo.

## DIC-i ayongzüka Kohima nung sentong ka agitsü

**Dimapur, Rongjui/September 23 (TYO):** India nüjiso ngur küm 75 ajungba nüngtem nung ayongzüka 'Azadi Ka Amrit Mahotsav' sentong nung shilem ka ama "Showcasing India as a rising Economic Force" omen nung ajemdaker Directorate of Industries and Commerce, Nagaland Kohima, Conference Hall nung September 25 nü 10:00 ako nungi tenzüka sentong ka agitsü.

Iba sentong ya Directorate of Industries and Commerce, Agriculture and Export Products Development Authority of India (APEDA), Directorate General of Foreign Trade (DGFT) & District Administration den longjemer District Industries

Centre (DIC) Kohima-i ayongzüka agitsü renema lir. Sentong agiba mapang local exhibitors temi parnoki yanglutetba osettem sayatsü.

Iba sentong nung N. Bhavani Sri (IAS) ADC Kohima-ia shilem agitsü. Shisalen agütsür aser ojembirtem rongnung Central, State sorkar kübok department balala nungi ketdangsurtem aser entrepreneur temi shishilembatsü lenmangtem aser entrepreneur tem shishilembaba jenjang ajungkettsü atema teyari lenmangtem indang tangazükba balala agütsütsü.

Iba dak sendakba nung tejangrarter aser entrepreneurs iba sentong nung arua shilem agitsü jaokogo.

## Phek nung PMKSY-WDC shibangba sentong agi

**Dimapur, Rongjui/September 23 (TYO):** Phek jila nung September 23 nü PMKSY-WDC (Erstwhile IWMP) Batch V + VI (Project IX & X) shibangba sentong agiogo. Iba sentong ya WDT züngsem Vesalu Puro lenisüba nung agi aser Deputy Commissioner, Phek, Razouvolie Dozo, NCS ajakteta jaoker liasü.

Sentong nung okila DPO Land Resources, Phek Levi

Bennet-i jembiba aser Chisato Vero (Project IX tenung nung) o Solomon Thüvüry (Project X tenung nung) natia o tatsütsü jembiba liasü.

Ojembiba mapang DC Phek, Razouvolie Dozo-i, sorkar scheme tem mashiyimi mamshitsü ayongzüka den stakeholders ajak dang parnoki akokba yari tajungtiba inyaksü ajungshia liasü. Sentong nungsa Neilhoulivole, AI-i tepela anküp o jembiba liasü.

## Noklak nung consultative senden menogo

**Dimapur, Rongjui/September 23 (TYO):** September 23 nü DC Conference Hall, Noklak nung Panel for Review of Communitization of Public Institutions & Services Act, 2002

District level consultative senden ka menogo.

Senden nung Panel for Review of Communitization of Public Institutions & Services Act, 2002 mendenbula Banuo Z Jamir, IAS (Rtd)-i ashiba agi, Communitization ajanga yimtsüng jenjang nung terenlok maparen nung temelenshi adokba indang sorkari metetner. Mandenbulaisa, kümtem tsüngda Communitization ajanga temelenshi bener arutsüba indang jangjatsü atema yimtsüngtem nungi parnok tebilemba angadangsü atema line department tem dang

mepeshia metetdaksü.

Banuo Z Jamir, IAS (Rtd)-i, line department tem nem questionnaire lemstü aser parnok dang ken o kanga junga asadangshia parnok tebilemba bendenloker questionnaire tem October 15 matong tsüngda agütsütsü metetdaksüogo.

Iba senden nung mendebula den Member Secretary, panel for review of Communitization of public institutions & Services Act 2002, John Lohe aser tanga ketdangsurtemi shilem agia liasü.

Deputy Commissioner, Noklak Hiazu Meru lenisüba nung iba senden amen aser Education, Health & Family Welfare, PHE, Power, Social Welfare, Rural Development aser District Administrations nungi Department ketdangsurtemia iba senden nung shilem agi.

# BTC administration-i appointment letter agütsü



BTC administration-i appointment letter agütsüba yangi noksa nung angur.

**Kokrajhar, Rongjui/September 23 (Agencies):** Bodoland Territorial Council (BTC) administration-i Bodhbarnü, ULB telungpur asütsü ta temlung melemi nisung ana khasetba rongnung kaer kinunger nem appointment letter ka agtsüogo. Iba nisungba ya taoba Honibarnü Assam kübok Kokrajhar tesem nung police temi telungpur tenüng amer asaa khaset ta aitsüogo. Bodoland Territorial Region (BTR) CEM Pramod Boro-i, asür Janak Brahma adianu Sanjib Kumar Brahma nem appointment letter agütsüogo. Kasa tatalokba nung khasetsang Jwngsar Mushahary'er kinunger nema anogo ishika tsüingda

appointment letter agütsütsü, ta osang ajanga metetdaksü. BTR chief Pramod Boro-i ashiba agi, compensatory ground nung Janak Brahma adianu nem appointment letter agütsüogo. Paise, iba lendong nung asür ana kinunger ajangzüksü atema sorkari takokba tashi jenjang tapet agidar, ta ashi. Boro-i ashiba agi, chief minister Himanta Biswa Sarma-i commissioner jenjang nung iba tatalokba bushitsüingdantsü atema tetuyuba agütsüogo aser aibelena alirtem temzüng ozüing dak ajemdaker merenshitsu, ta ashi. Kasa mapang nung All Bodo Students Union (ABSU) aser All Assam

Tribal Sangha na longjemer Bodhbarnü Kokrajhar nung ochi obendang agütsütsü aser iba ken o atema judicial inquiry ka benoktsü khanga longkak aitogo. Kokrajhar kübok Bodofa Children Park nung longkak aitba sentong nung institution balala nungi kaketshir aser iba tesem nung alirtem noklang aikati shilem agia liasü. Parnoki Kokrajhar DC ajanga chief minister nem tezüluba nung takhangba ka agütsüogo. Longkak aitba nung shilem agiba mapang ABSU tir Dipen Boro-i, iba amala kuli tejangja makai nisungtem khasetba inyakyim ya magizüksü aser aibelena alirtem merenshitsu, ta ashi.

# Assam: Police temi longkak aiter ka khaset



SIPAJHAR CLASH

**Mangaldoi, Rongjui/September 23 (Agencies):** Ozüing alema ali atsünga alirtem aninba maparen benoka inyakba mapang tensa mejungi küma, Assam kübok Sipajhar tesem nung police temi injang akhaba mapang nisung ka khasetogo. Kasa mapang nung iba lendong nungsa police pongu yira liasü. Ozüing alema ali atsünger alitem mintoktsü atema Darrang district administration nungi ketdangsürtem iba tesem tonga aoba sülen Sipajhar-Dholpur tesem nung local tem aser police na tsüingda mangatetep adoka liasü. Brehostibarnü anepdang

armed security personnel temi meiner Darrang district administration nungi ketdangsürtem, ozüing alema inyaksangshirtem anintsü atema Siajhar-Dholpur tesem tonga aoba mapang iba tesem nung alirtemi longkak ait. Mapang tatsüka lir longkak aitba sentong ya maziükteti aküm aser longkak aitertemi sünglong aser hadir techira amer police tem aser tanga district administration tem amak tenzüik. Tensa maziükteti akümba sülen police temi longkak aitertem dak arrsüing agi züka meinshitsu merang. Ajisüaka

tensa maziükteti nüburtemi police tem amak tenzüikba sülen police temi prangbong akha tenzüik aser nisung ka khaset. Brehostibarnü iba tesem nungi kibong 500 dak tema aninogo. Hombarnü iba tesem nungi kibong 800 dak tema anina liasü. Iba tatalokba dak sendakba nung yimden yimsüsürtem aitsütep tenzüikogo. Assam Congress tir Bhupen Borah-i nisung taküm ka samaba sasaa bilemba lemsatepogo aser state nung temzüng ozüing tensa tamajungba kümyonga aoba atema state sorkar aija liasü.

# Manipurnungtetsürtemshishilembadaklapoktsü

**Imphal, Rongjui/September 23 (Agencies):** Manipur nung tetsürtem atema mejeta lapoktsüba shishilembadak ita ishika shibanga ataba sülen lapoktsü atema sorkari sangdongogo. Shishilembadak amenertem aser shishirtemi COVID-19 dak sendakba nung inyakyim shidak benoka inyaksangshi nungang iba shishilembadak lapoktsütsü, ta tetuyuba nung shia lir. State Disaster Management Authority (SDMA) state executive committee mendenbuba aser Manipur Chief Secretary Dr Rajesh Kumar-i iba tetuyuba nung sign süa liasü. Tetuyuba nung ashiba agi, shishilembartem telok ana küma lemsatsütsü aser Imphal Municipal Corporation (IMC)-i shishilembartem nem stall number agütsütsü. Corporation-isa, shishilembartem tsüingda feet trokbosa iter inyaksangshitsu atema anepalutsütsü. Iba dak alia IMC-isa, shishilembartem ajak nem

hoptashia anabenbosa parnok indang osettsütem ayoktsü atema maongka agütsütsü, ta kasa sangdong ajanga metetdaksü. "Shishilembadak IMC-i merektetsü atema Deobarnü shibangtsü," ta tetuyuba nung shia lir. COVID-19 agi state kongshiba sülen tetsürtem shishilembadak ya ita 11 shibanga liasü aser 2021 küm February ita lapokshi. Ajisüaka wara tanaben poktetshiba ajanga shishilembadak shibangtsüsa aküm. Wara poktetba ajang state mapang shia mokdangba agi shishilembartem rongsenketsüing nung kanga akoksaogo. Temetetsükaji Manipur sorkari, Imphal nung amenoka aliba Asia nung tetsürtem shishilembadak tulutiba Nupi Keithel ya April 21 nü shibangtsü tetuyuba agüja liasü. Shishilembadak lapoker ita ana majung tsüingda ibe telemtetba ya agi, kechiyong wara agi state kanga mejungi kongshi.

# Mizoram nung heroin bener lia nisung asem apu



**Aizawl, Rongjui/September 23 (Agencies):** Aizawl nung heroin sen lakh 10.5 alang bener lia Myanmar nung ka densema nisung asem puogo, ta Mizoram Excise and Narcotics Department-i Bodhbarnü sangdong ka ajanga metetdaksüogo. Kasa sangdong ajanga ashiba agi, excise and narcotics department nungi ketdangsürtem aser Border Security Force (BSF) sepaitem longjemer Aizawl kübok Bawngkawn tesem meita aoba mapang temesepba mozü ya ayoker asem ket nungi heroin

gram 359 nguteta liasü. Aija alirtem ya Myanmar, Falam district kübok Liandu nung alir Manglianhre (20) aser Aizawl nung alir F. Lalrinmawia (27) aser Jerry Lalrammuana (23) na ta jangjaogo, ta sangdong ajangsa metetdaksü. Sen lakh 10.5 alang temesepba mozü ya Myanmar nungi shibelener aru, ta Department-i ashi. Narcotic Drugs & Psychotropic Substances Act, 1985 kübok section tapet dak ajemkdaker nisung asem ya aitsüogo, ta metetdaksü.

# Assam nung Maoist lenir Tingraj Orang bendanga agütsüogo

**Guwahti, Rongjui/September 23 (Agencies):** Osang ajanga ashiba agi CPI (Maoist) lenir Tingraj Orang Assam police matsüingdang bendanga agütsüogo. Oranga ya Assam, Dibrugarh district kübok Naharkatia police station telongtet nung aliba Samuktola yimtsüing nungi lir aser pa iba telok nung 2007 küm aden. Maoist, lenir shiba süngolu ayimba lokti nungi lir, pa

Jharkhand kübok aremin ka nung training agia liasü. 2011 küm pa Orissa kübok Sundergarh district nung apu aser Assam-i anir aru. Iba sülen mapang tatsüka lir pa bail nung tepuokdak nungi chiok. Tepuokdak nungi chiokba sülen pa maneni aremi ao aser iba sülen kolen ali mejangjai liasü. Taküm June ita Orang kinungtsü asüba sülen par chir asem kanga timtem tekangshi nung liasü.



## TIR YIMYIM YIMOBILEM (EDITORIAL)

DIMAPUR ROGONÜ, RONGJUI (SEPTEMBER) 24, 2021

### Covid koka odagi

**N**agaland nung alirtem asoshi osang tajung kaji, tang tashi nung nütsüng yongsük tesadang ka dang nungi talii Covid-19 tashidak nokdangba mozü jem agiogo aser iba jagi metemeteta, Covid agi shiranger aser asürtem kanga ajema akümba anogo shia agütsüba osang ajanga asenoki meteter. Nagaland nung ya Covid jem tapu ana agir, kaji Covishield, yabo government-i angati agütsür aser tangabaji Sputnik V, iba yabo sen agi alia agir. Tang tashi nung Covid jem agir nisung lakh ter shi rongnung arishi küm 45 ser tekapurtem nisung ajak agi lakh asem dak tali lir aser arishi küm 18 nungi 44 tashi purtem nisung ajak agi lakh pungo dak tali kümogo aser tanüngbaji mozü kidang inyakertem lir. Atangji, nütsüng yongsük nunga taintem dang nungibo küm 44 teküpbok lanurtem teimba asüba kija kuli agi masü saka tanü asüng lima nung tangatetba nunga lanurtem tekaraba aser tuluba küma aiener. Aji oda, alima tensa mopong melenshia aodang, tajung majung aser shitak meshitak bendangtetsüba tashi aser shisatsüji lanurtemi tama angur aser meteter. Talisa, tanü putu ya osangtüsang yakyakta angashiba aser anguba putu ka nung alir asünungji, alima ajaklen atalokba ajaklen angur aser meteta adoker. Ajisüaka, tekümdangtsü kaji asenoki angashiba aser anguba osangtüsang ajakbo shitak masü, aika olulu aser taila osang shitak küma yanglur prokshiba angur aser angashir. Iba jagi asenok ama tongmelang nisungtemibo tanguba aser tangashiba ajak dak khen nung zep ta amangadoker, anungji aiben maparen aika nung ashiodaktsür. Alima nung ajungbenaka Covid-19 tashidak wara poktetba sülen, alima nung iba tashidak den raratsü mozü maka nisung aika südaktsüogo. Iba ama shisabolu tialong nung shisatebulutiba aser khuret tulutiba abenertemji medical scientist-tem lir. Covid ama tashidak wara den raratsü asoshibo yimsüsürtemia kecha balaka meinyaktetsü aser tamangertemia sarasademtsüba dak alaka teinyaktsü tulukabo madoker, ajisüaka tashidak mesen poktetba indang metettsü aser tashidak nokdangtsü aser aneptsü atema mozü yanglutetsüba tashi ajakji medical scientist-tem dak dang keta lir. Ajisüaka, asenoki aiben medical scientist-temi bushitetba aser yanglutetba mozü nung temulung malemer. Iba tebilemstüji tashidak dang nungibo tuluba lir. Iba jagi asenok aikati tanga Covid jem dak temulung malemer aser olulu tapu balala adoka jembir. Atangji, koba mapa nung südir süaka mamangba purtem kangshia amangdaksütsü makoker aser yamaji temulung melemtetba purtema kangshia temulung lemdaksütsü makoker. Item ajakji pei tangatetba dak dang keta lir. Atangji, tang tashi nunga Covid-19 tashidak aneptsüasabo mozü yangluteta maka, tang agiba Covid jem yabo Covid tashidak nokdangba mozü dang lir, ibayongji meshirangtsü atema meshirangdangyongi iba mozü ya agiadoker. Koba mozü südirasüka, iba mozü jagi kasa tashidak agi shiranger ajak aneptsü ta masü, kechiyong nisunger arishi yabo teyanglur Kibuba ket nung dang lir, anungji tashidak nokdangtsü aser aneptsü mozü agiyonga asen nem Teyangluri lemkütsüba anogo aser tango agimadokra, ojang, alima nungi pilar Teyanglur ajurutsü renemtsüba dak alema kecha mali. Ajisüaka, alima nung mozü ngutetba ajak ya Tsüngremi nisung nem agütsüba shisatsü ajanga ngutetbatem lir, anungji Teyangluri lemkütsüba arishi tema alitsü asoshi meshirangtsü mozü agitsü aser shirangdang aneptsü mozü achitsübaji Tsüngremi mulungba mapa lir. Tang ama tashidak wara tulu nokdangtsü aser aneptsü asoshi mozü yanglurtemi küm trok tenet agia yanglur ser nung, tang aritepa küm ka tsüngda mozü yangluteta agütsüba yabo nisung dak mozü agi tendanger ta aikati jembir aser Covid mozü agitsü nungnanger, ajia shitak, saka küm trok tenet atadangji, ashiko, asenok aika Covid agi iba lima nungi agiener alitsüa akok. Ibai mipang nung inyaker, anungji mipang tepdangtsü asoshi shibai kechi nguteta bener arudir, iba dakji temulung lema amshitsü tim. Aji mesüra, arem nung mirok mi aoba menokdangtet yim dena rongdokba ama ataloktsü. Tangbo asen lima nung lanurtem aikati mulungsua Covid jem agiba agi, Covid tongpang koka aoba angur. Aji oda, tanü putu nungbo taintemi kechi bilemer aser kechi ashir ta masü saka lanurtemi kechi bilemer aser kechi ashir ta asüba sülen anidak nung dang asen taküm dang masü asen lima aser asenok lokti-a tamajungba nungi kümzüka yutettsü.

## OLEMSABANG

### Tanüla nung yasatzüraba America nungger sannüker D.L. Moody

~ A. Imdong Jamir, Dimapur

America lima Chicago yimti Farewell Hall nung nisung mesemi revival sentep sentepa alidang Tsüngremi shimtetba Ira-d-sankey-i tanü yisui ajar pa dangi oang o bendang arudar tasü ana kotaker tsüngtsüng ola ama aten. Tsüngrem osang D.L. Moody-i langpang nungi jembia aodang tesüngmangtsü lendong Chicago yimti mipok ola, mi remsepba kol ola sepoyitem ola, kinü tila, pei tetsü bushiba ola, ajip ola mangyim ola, mi yipro ola mokozü arba ola, yimti tsüngtsüng atemba ola, ali nung tatalokdak maka ni yakta kü Tsüngrem o anener sentep shipang. Ibai October ita aonung ka 1871 küm sannüker D.L. Moody, sarasadem, Oh oba, kü akümüli khuret nü tanüla temeshi küm nüm kua, ni teka tezüng, ni tanüla tzürrar, tanüla yaseter, ni kechi inyaktsü. D.L. Moody pa mulong nung jembir. Tanüla temeshi maka tashi Tsüngrem sendong mangu kuda ni sannüker inyaktsü pai apusoa oa, tanüla agi asüngba C.H. Spurgeon George Muller, Harry Moorhouse nungger tsüngdangi oa apudaka khuret lemsatet. Idangji America tsür anati na atema sarasademtsür ta tanüla jungkai adok. Tawa tu America tsür tantsür anati pa dang D.L. Moody na tanüla ain agizükang, agizükang ta kidangi jaketer sarasademdang kanga nendaka shir liasü ta otsü agi ashir.

D.L. Moody mulongjang tip matemer pa mulong tanungba (groaning) ni sannüker tanüla temsa maka ain mali taaktsü koda tulu. Ni yamai malitsü kenü anogo Brooklyn Chapple hall nung sentep agia alidang England nungger Douglas Russel tanüla temeshi agi asüngba tenzüker pa arua mensema ngua pai tanüla o ken jembian ta sür langpangji agütsü. Indang indanga Russel nisung chir tamanger shirnok tanüla nung aso parnok Tsüngrem chirtem, asenok Tsüngrem tenzüker aiega tsüngrem nungi tanüla temeshi mongui tenzüker aiga lir. D.L. Moody idangjisa langpangji or aji ni ta pai langpang nung tsünga jipa jempia pei khuret tokzüka jipa jembir. Tsüngremi sannüker D.L. Moody tanüla tzüraba tanüla ayaba nubor asoshi pa taginüba khuret ngua kenü anogo New York yimdong nung jajadang aoksa kotak nungi tanüla mopong sem tulu alua pa dak kongshi. Pai pa tebang agi rasaa meshitetba pa temang shisatsü molungsentsü kenyongi melenadok. Pai pa kong nokdaka lir, memeteti aküm. Pa asoshi ibai tesüngmangtsü anogo ka liasü. Pa tasü taitba aküm. Mapa tasen tuluba inyaktsü nupor asoshi nüksü khu abentsü pai jangraa aküm. Ro 8:26, 27 Aser yamajisa tanüla asen mokokmin yarir, kechiyong asenoki koda sarasademtsü tim aji memetet saka tanüla pa sasaa asenok asoshi mejembitetba tanüngba agi mepishitsür, aser shibai temulungjang bushir pai tanüla temulung meteter, kechiyong pai Tsüngrem mulongba ama temishipur, atema mepishitsür. Kechiyong kwika Tsüngrem tanüla agi anir parnok Tsüngrem chirtem lir. Ro. 8:14

Asenok Tsüngrem chirtem ya tanüla pei sasa asen tanüla den kuli agütsür. Ro.8:16. 1871 küm sannüker D.L. Moody Chicago yimti Baptist Arogo Revival sentep aonung atalokba kitsük kirong lendongji ata mata masü. Iba lendong maksü khuretji pai pei sasa agi Tsüngrem dang nai ni kong toktsür, kechi ata ashir pai ku kua, nangre kangshir Tsüngrem belumba bushitsü tenzüker. New York yimdong nung tena ajurutep. America nungger George Mueller pa sannüker ka masü. Aria meimba tanüla, tejungnü, tagütsünü. Pai tsürapur malir lajar 2000 shi aniteta mesüa school, Sunday school, sayua mesüa alidang asüngupo mamatsü drop kata mali, ali nung apudaker, oh oba ni tanur lajar 2000 dang kechi ashitsü anüpdang 2:00 am nungi George Muller anüpdang 2:00 am nungi lumia sarasadem Oh oba tila 2000 den tejak koda ajuruteptsü. Nüksü yima mamatzü marok tazüngi oa repring dangli tanüla khuret tali, sarasadem sarasadema alidang, aoksa nisung kati kishi nung akushipen akushi, teti mamatzü ayoker ka oagi yimti jagi aor, car tetsüng raksar moteter, car nung yua aliba mamatzü ajak ya nai agizüka yuang sen jengjanga kecha mali, Muller tepela agi nüksü yima Tsüngremi kü sarasademba, Tsüngremi kü mokokmin tia yamai meteta taochi mapa patakati inyaker no? ta süngmangseta nüksü yima sarasadema car ka sünga bena aliba mamatzüji tila tanurtem nüm agizükdaktsü. Pokzüng shisa bulua aliba tila tanurtem asüktema pelabaji Tsüngrem sentsüwangshi periogo. Muller tamang sarasadem koda tulu. Alima tanüla temeshi kar pelashishia Tsüngrem temulung chidakja tenzüker pai ajaba ano mepedaki pa alidaki aotsü tatem makadak alitsü koda tajung. D.L. Moody koba anogo pa dak tanüla temeshi agi kongshi. Ni sannükba masü alima nung yisu memetetertem meshi mejunger arem shiruru tia nung nemzürtem dang yisu otsü ashitsü pa tenangzüka tulu liasü. Chicago yimti Henderson tsüngsem dokan nung pai jangraba tanurtem sujen longjen supor tanur 18 ajuru, temeim adianutem osang kakat azüngertem ochi tanüla temeim tanüla agi langka tajung inyaktsü bilemba Tsüngrem angubaji koda? senpak 5 (pungo jenjang tanga yisu asoshi nai bilembaji pai yongyaa lir. kechiyong nenok timtem angutsü Tsüngremi mulungra, tamajung inyaka timtem angu dang nungibo mapa tajung inyaka timatem tajungba. 1 Peter 3:17 shibai sensaker dang aria bilemer pai kibuba nüm aputsür. Aser pa mapa tajung asoshi pa num pai shia agütsütsü. As 19:17. Shibai sensaker indang bilemstür pa temoatsüba, tamajung anogo nung kibubai pa kümzüksü. TK 41:1

Sannüker D.L. Moody mulongjang nung tepetzük tia, tajemrep tia nung alirtem nüchi küma yoktsü. Pai kanga nunga (groaning) bilemba Tsüngrem angu. Aoksa pai Michigan awatsüng nung rong tejen ka pungdaka angu, iba rong tejen nung kenü pai ajuruba tanur 18 yimdong nung senzürtem tu jadena iba rong tejen nung yisu otsü shia tenzüker Sunday school pai Yisu otsü shia par rogo den par pur meyrjang 1500 ka noklang pungo sentep. Pastor D.L. Moody laishiba amer Tsüngrem o masü tepetzük tiar tem tu aniden anidena yangji arogo ka tenzüker. Pastor D.L. Moody tanüla temeshi maka ali shisatsü temetetba tesa agi ni mapang talangka belümseta yamai aru no? pai pei sasaa saseta jembir. saka asen taküm moral taküm yimya asüngteta merükteta melira tanüla ase mapa nung masemtsü mulongsen temerük shisatsü tasüngtet oda tetsür nü menden temerüktet nungdang tanur among ama tasüngtet molungsengi tanüla kanga sapua bushir. Pastor D.L. Moody dak aria meimba shisatsüji Tsüngremi kanga repringa liasü. Asenok sarasadem melangzüba ya asenok shisatsü mulongsentsü masüngtet. Shi azü mazüoktet, azü apong masüngtet iba ama sarasadem Tsüngremi maginer. Yakob tasütsü anogo agi atungdang pa chir tambusang Reuben tang ashi, na tambuti, saka nai pei tebu yipten menentsü nung tambu shilem Israel chir Yosef chirtem nem agütsü anungji pa kidong otsü nung mezülü. 1 Puti 5:1. Asenok tsürapurtem, Tsüngrem tenzükertem teküdddangtsü, tansütsü tatishitsü tulu ji Reuben taküm yimya moral majungba menen khuret ji asenokia metetdi. TK 103:17(c) pa temishibaji chir nungi chirnur tashi alitsü. TK 37:3 Kibuba dak amangang, aser tajung inyakang aji sura na ali nung taso shai alitsü. Pastor D.L. Moody-i Michigan awatsüng süng rong tejen ka nung meshi mejunger tanur 18 anir tenzüka arogo pur 1500 tema inteta aor, ano pai par yimti nungsa arogo ka tenzüker. Tamanger zina aküm nung tenla ki tasen tuluba yangluluka yangjia pastor inyak. City Relief society pai shilem tulu agia item tiyari ajanga tanur sensaker chir 800 num chiyongtsü lemküka mesü. Ano repsema par tsüngsem dokani Tsüngrem o angatsü arurtem ajia paisa repringtsüla. Tanüla temeshia kar tasemer meliaka pei pei saa nangri kanger belumseta inyakbaji Tsüngrem temulung achiba kuli. Kibubar tanüla motsüngnem chinpak nung sannüker D.L. Moody ama tanüla (renemtsü) nangre kangshir, uro ro atena pei kija süaka meyo meyo ali ajema, tasü itshir machi majem arema, anü ayiba repringa kibubar lu nung inyaker. Pai ajaba anogo nung ayipa atudak atentsü. Koda tatem maka tepelatsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Morocco nung Islamic sorkar atsüngdokba agi Khristantem pelar

**September 23, 2021:** North Africa nung aliba linük-Morocco nung tesüiba küm 10 tashi Justice and Development Party (PJD)-i aniba Islamic sorkar liasü saka tawa elections nung linük nung liberal party temi Islamic sorkar atsüngdokogo.

Menden 395 aliba Parliament nung PJD-i menden 13 (jenjang 8buba) dang angu.

Tang mezüing vote agütsür aser Agadir nung Arogo tasen tenzütsür, Rachid Imounan-i, "Islamic sorkar atsüngdokba agi onoki Yisu dang pelar. Tsüngremi onok sarasadem langzüogo aser tangbo onoki aginünba sorkar aruogo," ta metetdaksü.

September 11 nü King Mohamed VI-i ketdangsüa National Rally of Independents (RNI) nungi Aziz Akhannouch nem Ato kilonser tenangzüka agidaksüogo. RNI-i menden 102 ngua liasü.

Tang linük nung rongsenkettstüing jenang mejungi aliba mapang nung teloktep sorkar akümtsü atema Aziz nem tashi agüja liasü.

Khristantemi linük nung temeden balala agütsüba party ajak 'liberal parties' ta züngshir. Ajisüaka Islamic party temi Sharia ozüing benokner, tetsürtem nem temeden magütsüner aser market nung ak shi aser yi nokdangner.

"Aziz Akhannouch ya

shishilembar ka lir. Nai anü mesüra ita külemaka pai mashishitsü. Pai tamangba yimsü balala anema meinyaktsü," ta Khristan, Youssef Ahmed-i metetdaksü.

Open Doors-i ashiba agi, tang alima nung Khristantem tamajungba reshikangshiba linük 50 rongnung Morocco ya jenang 27buba nung lir.

Islamic party PJD-i linük tesem ajungalen Sharia ozüing benoktsü meranga liasü saka linük temzüing nungbo linük nung tamangba yimsü ajak sadoka amangtsü atema temeden agüja lir.

Morocco nung recognized yimsüji Islam aser Judaism na dang lir, saka tamangba yimsü balala amangba atema temerenshi mali.

Morocco nung Khristan nütsüing 2,000 nungi 25,000 tsüingda dang lir aser Khristantemi Islamist party dang Tenla kitem lapoktsü mepishia liasü saka sorkari linük nung Khristantem tenüing ajak zülur agüjang, ta tuyu.

PJD atema tanela tsütsü tesayur, Ahmad Raissouni-i tawa Afghanistan nung Taliban-i sorkar akümba atema Taliban nem tenüingsang agüja liasü.

Yaküm December ita nung Morocco-i Israel den tesendaktep yanglushiogo.

Morocco election atema nüboyimba mapang nung linük rongsenkettstüing jenang majungba ya tongti onük ka liasü. Coronavirus wara

mapang nung Morocco nung rongsenkettstüing ainba shilem 15 tashi ajema aküm.

Election mapang nung Aziz Akhannouch-i nüburtem nem mapa maongka agütsütsü nangzüka liasü. Pa ya Africa nung takartibatem rongnung jenang 12buba nung lir.

RNI party ya 1978 küm taoba mapang Chuba Hassan II'er aianu kinüngbui tenteta liasü.

Rabat International Arogo nung taoba mapang pastor, Jack Wald-i, linük nung ochimashi anema raratsüji sorkar ajak atema kanga tasak asütsü, ta metetdakja liasü.

Pai ashiba agi, linük nung Khristantem reshikangshiba yabo tebilemtsü onük tilaka dang lir, kechiyong linük nung ochimashi tulu lir aser rongsenkettstüing jenang kanga majung.

Ajisüaka linük nung tamangba yimsü ajak sadoka amangtsü atema temeden agütsüba ajanga Morocco nung azükarutsü, ta pai ashi.

"Ni Morocco nung dang Khristan revival ka atema sarasademtsü mepishir, kechiyong ibaji ajanga linüki nüngdakba ataloktsü," ta paisa ashi.

Rachid Imounan-i, "Sorkar tasenbai Khristantem nem temeden agütsütsü asü magütsütsüar ni memetet, ajisüaka sorkari Khristantem den jembitsü ta ni amanger. Ajisüaka tatembangbuba telemtetbajibo Chubai agütsü," ta metetdaksü.

## ANOGO ABEN TSÜNGREM DEN

### LENISÜBA TANELA

"Ochi Tanelai nenok ajak ochiba dangi anitsü."

Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesüli idakji jangratem aser tipdem ka malitsü. Iba indang tenyar Yohani tejanga ashi. "Shirnoki nenok mashileni anisar, parnok indang ni item o nenok dangi züluogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüingdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashiocksütsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaksüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksütsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

- 1) Sayutsüingiba mezüngmeshi masütsü
- 2) Ajak tendanger tajungba ametang
- 3) Tamajung kechisarena nung pilaa liang. Tesalonika arogo nung Grik nung süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüingiba ajanga Asentenshi sayutsüingidang sayutsüingiri mezüngbuba onük nungji aibelener. Metendangi agizükba aser tamajung nungi pilaa maliba jagi ajamaluba Tsüngrem Tanela tali jashidaksüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülü aser jembir, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

## Jharkhand nung yimdaklirtemi Khristantem sendoker



Jharkhand nung tribal Khristantem dak azükba sülen kou ongdoktsür aliba noksa nung angur.

**September 23, 2021:** India kübok Jharkhand state nung aliba yimtsüngtem nung yimdaklirtemi Khristantem sendoker, ta osang ka ajanga metetdaksü.

West Singhbhum district kübok Mangapat Sirsai yimdak Khristan kibong asem sendoka liasü aser yimdaklirtemi parnok dang tribal Sarna yimsü dangi tanaben meyipang ta tuyur. Küm ka tejaklen kibong asem jagi Khristan yimsü agizüka liasü.

September 17, 2021 nü village council-i, Khristantem nem yim oset aser kiojen kecha mamshidaksütsü, kiset shirurutem mechiyimdaksütsü, lokti sentong kecha nunga mejaoktsü aser parnok den shingaia jembishinü masütsü lemtetogo.

Adivasi Ho Samaj Yuva Mahasabha Tir, Gabbar Singh Hembrom-i yimdaklirtem dang item telemtetbatemji shidak beshitsüla mesüra senchi achitsü, ta metetdaksüogo.

Khristan kibongtem sendokba aser yimdaklirtemi parnok jendokbaji Amongnü shia senden mena asadangtsü aser tashi mangartem dang senchi achitsü.

Hembrom-i, "Küm ka tejaklen Khristan yimsü agizükba kibong asem dak alaka yimdaklir ajaki Sarna yimsü beshitsü. Parnoki tanaben Sarna yimsü dangi meyipdi süra onoki parnok agizüktsü saka parnoki memelunger," ta metetdaksü.

Hembrom-i ashiba agi, Khristantem sendokba Khristan missionary kari nokdangtsü atema ozüing ka yimtsüngtem nung tribal benoka lir.

Jamshedpur Arogo nung dangi meyipdaksütsü atema ali aser sen agi mesüzüker.

District superintendent of police, Ajay Linda-ibo, "Iba linük nung tamangba yimsü mashie amangtsü atema nisung ajak nem temeden agüja lir. Pei kabu nung ozüing amshira temerenshi tulu alitsü, ta telok anaprongla nem metetdaksüogo. Yimdak lendong mataloktsü atema onoki tenük yokdar," ta metetdaksü.

2017 küm Jharkhand state nung anti-conversion ozüing ka agizüka liasü aser iba ozüing kübok aibelenertem küm 3 tashi tepuokdak ayutsü aser senchi 50,000 tashi achitsü akok.

Yimtsüngtem nung Khristantem sendokba sülen Khristantemi yimdaklirtem den tesendaktep kecha meyuteter, yim tzübo nung tzü metadaksür mesüra dokan nung meshishidaksür aser amalitep kecha masür. Iba ya Jharkhand nung dang masü saka state aika nung talisa yimtsüngtem nung beshir, ajisüaka Maharashtra nungbo yimtsüngtem nung

Jharkhand nung Catholic putirtemi state chief minister, Hemant Soren dang Sarna yimsü atema ozüing yangluang aser recognize süang, ta mepishiogo.

September 19, 2020 nü shidi ka ajanga putirtemi chief minister dang, "India nung temzüing kübok Arrla 25, 29 aser 342 ajanga tribal nisungtem oshi, yimsü, sobaliba aser maitsü temedentem wazüka ayutsü atema shia lir," ta metetdaksü.


**OLONG PAITEP # 5946**

|    |   |  |   |  |   |  |    |    |   |
|----|---|--|---|--|---|--|----|----|---|
|    | 1 |  | 2 |  |   |  |    |    | 3 |
|    |   |  |   |  |   |  |    |    |   |
| 4  |   |  |   |  | 5 |  | 6  |    |   |
|    |   |  |   |  |   |  |    |    |   |
| 7  |   |  |   |  |   |  |    |    |   |
|    |   |  | 8 |  |   |  |    |    | 9 |
| 10 |   |  |   |  |   |  |    | 11 |   |
|    |   |  |   |  |   |  | 12 |    |   |
|    |   |  |   |  |   |  |    |    |   |
| 13 |   |  |   |  |   |  | 14 |    |   |
|    |   |  |   |  |   |  |    |    |   |
|    |   |  |   |  |   |  |    |    |   |
| 15 |   |  |   |  |   |  |    |    |   |

|                         |      |                                 |     |
|-------------------------|------|---------------------------------|-----|
| <b>TIPLÉN</b>           |      | <b>LANGTSÜNGLEN</b>             |     |
| 1. Taochi sayuba        | - 10 | 1. Menungra                     | - 6 |
| 4. Temezüng agi kongshi | - 4  | 2. Mi tsükloker mesepba         | - 4 |
| 5. Ainer                | - 6  | 3. Süngo o tzü ajemba           | - 5 |
| 7. Chiyungnü            | - 3  | 5. Temenemtsü tajung            | - 7 |
| 8. Mi nung atsük        | - 5  | 6. Idak                         | - 4 |
| 11. Asen masü           | - 3  | 8. _____ ok                     | - 4 |
| 13. Lenmang ajurutepdak | - 6  | 9. Tebangi apuba kongki tapu ka | - 6 |
| 14. Yangi masü          | - 4  | 10. Tashi endokba metet         | - 5 |
| 15. _____ jang          | - 6  | 12. Tzü manung senzüba          | - 4 |

**OLONG PAITEP # 5945 TELANGZÜBA**

|   |                                  |
|---|----------------------------------|
| <b>LANGTSÜNGLEN :</b>                   | <b>TIPLÉN :</b>                  |
| 2. Kan, 3. IM, 5. Anüng, 7. Amsü,       | 1. Rebeka, 4. Adam, 6. Yohan,    |
| 8. Yosep, 10. Sara, 11. Isak, 13. Yakob | 9. Zü, 12. Sayutsüngir, 15. Ku,  |
| 14. Nana, 16. Noa, 17. Am.              | 16. Naman, 17. Abel, 18. Samuel. |



**SENTEP SENSHIR TENZÜKER, TENZÜKLATEM MEETING AMENER**

**Deacon** : Hai Pastor Alok, na topic ya kanga junga bilemdanger nisungi angatetsüsa jembianja.

**Mapangsur** : Haoja Pastorba, na Tsüngrem o jembidangji onoka tekolak jagibo Au ni! Au ni! ta angemtena anga sayur saka kechi jimber-ar kecha mangateter.

**Tenzükla** : pastorba na ya election tsütsü kanga temulung agütsür sudi, na Tsüngrem o jembiba ya politics, politics agi dang jembir, nai sama alir nisung kata tanela nung anir marutetsü.

**Pastor Alok** : Nenok sentepi aruba ya Tsüngrem dang tanela nung ne o angatetdakjang ta sarasadema mamener alitsüadi.

**Mapangtsür** : Kechi yazü jembitsü, nibo topic ji tenzükerbo joko teni agi kongga dang mejangatokerji politics agi jimber asü, kechi o agisa jimber-ar kecha memeteta, saka sentep temerbo or pastorba dang kanga junga jimbiogo ta salemba asürati.

**Pastor Alok** : Nenoki Liashiba ya mazünger sudija, Liashiba nung Yesui o-intepba jembiba ajak ya politics o dang lir, anungji nenoka Liashiba ya meranga zügang sura tanela nunga temoatsü angutsü, politics nunga tashi aitsü.

**Tenzükertem** : Wa-a Pastor Alok!!

**Lilir : Asangla, Mangimen.**

**TANÜBO NAI LANGZÜANG**

Q. Earthshot Prize 2021 atema India nunger kwika shima lir?  
 A.1 \_\_\_\_\_ B.2 \_\_\_\_\_ C.0 \_\_\_\_\_ D.15 \_\_\_\_\_  
 (Taruba adok nung onoki langzünsü)

**YASHI ADOK TELANGZÜBA : Nagaland**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Küyi**  
 (n) jalatem rongnung kü dang nungi tantsü, oyala ( my elder sister)  
 \* **Küyi** aser künu onok ajaki ki mapa inyaker.

**Kwa**  
 (v) meshiba, agüjang ta asüngdangba (beg)  
 \* Meshimetsüri yimdong nung **kwa** kwa ta meshia senzür.



**Happy Birthday**

**TENÜNG : LAISEN I IMSONG**  
 Anogo : September 24  
 Küm : 3  
 Talidak : Aoyimsen  
 Happy birthday Sensen. Ano Tsüngremi arishi talang moajang.  
 ~ Oba, Oja, Shisa, Aküm & Kinungertem



**NAI-A YA METETTER MA**

**INDIA NUNG NÜBURTEMI SAPUA ALIBA TWO WHEELER KAR: AUGUST 2021'**

|                      |          |                              |        |
|----------------------|----------|------------------------------|--------|
| - Hero Splendor      | 2,18,516 | - Bajaj CT 100'              | 26,578 |
| - Honda Activa       | 2,04,659 | - TVS NTorq                  | 26,288 |
| - Honda Shine        | 1,29,926 | - Bajaj Pulsar 150           | 24,621 |
| - Hero HF Deluxe     | 1,14,575 | - Hero Glamour               | 23,747 |
| - Bajaj Platina      | 56,615   | - Royal Enfield Classic 350' | 23,453 |
| - TVS XL 100'        | 52,607   | - Hero Super Splendor        | 23,187 |
| - Suzuki Access 125' | 49,135   | - Yamaha Fascino 125'        | 18,037 |
| - TVS Jupiter        | 45,625   | - Hero Pleasure+             | 17,200 |
| - Bajaj Pulsar 125'  | 32,659   | - TVS Apache RTR series      | 16,423 |
| - Honda Dio          | 26,897   | - Yamaha Ray ZR              | 16,064 |

**SUDOKU # 5987**      **TELANGZÜBA # 5986**

|   |   |   |   |   |   |   |   |   |   |   |   |   |   |   |   |   |   |   |
|---|---|---|---|---|---|---|---|---|---|---|---|---|---|---|---|---|---|---|
| 5 | 6 |   | 4 | 9 | 8 |   |   | 2 | 4 | 5 | 7 | 6 | 9 | 1 | 3 | 2 | 8 |   |
|   | 4 |   | 1 |   | 2 | 6 | 5 |   | 2 | 9 | 8 | 3 | 4 | 7 | 5 | 6 | 1 |   |
|   |   | 1 |   |   |   |   |   | 8 | 4 | 6 | 3 | 1 | 2 | 8 | 5 | 4 | 7 | 9 |
|   |   | 4 | 6 |   | 9 | 2 | 1 | 5 | 9 | 4 | 6 | 8 | 3 | 2 | 1 | 5 | 7 |   |
|   | 2 |   | 3 |   |   |   |   | 8 | 1 | 8 | 5 | 9 | 7 | 6 | 2 | 4 | 3 |   |
| 8 | 9 |   |   | 1 |   | 3 | 4 | 6 | 7 | 2 | 3 | 1 | 5 | 4 | 9 | 8 | 6 |   |
|   | 8 | 3 | 7 | 5 |   |   |   | 2 | 3 | 1 | 4 | 5 | 6 | 8 | 7 | 9 | 2 |   |
|   |   | 2 | 9 |   |   | 8 |   | 1 | 5 | 6 | 2 | 7 | 1 | 9 | 8 | 3 | 4 |   |
| 1 |   |   |   |   |   | 5 |   |   | 8 | 7 | 9 | 4 | 2 | 3 | 6 | 1 | 5 |   |

**OJANG LUTEP # 5532**

SHTAI :

NGAA :

ITASHK :

ANDG :

KRINYAA :

NGAISHIA :

SHISAHIA :

SÜMNGSHETOIT :

NGDANÜK :

MKEADOR :

**OJANG LUTEP TELANGZÜBA # 5531**

PEI NEM MOATSÜBA SEMPET TAMSHI SHIA TAJUNG TIBA NUNG AMSHITSÜ MERANGANG

**TAN HOPTA ATEMA - KOMA SÜLA ?**

Q. Nagaland nung school-tem ya akhi ama lapokdaksü nunga koma süla ?



September 23, 2021 nü Ato kilonser, Narendra Modi Washington DC tonga arudang India nungeri pa agizükba noksa nung angur.

## Taruba hopta SC-i Pegasus ken o dak sendakba telemtetba agitsü

**New Delhi, September 23 (Agencies):** Brihostibarnü Supreme Court (SC)-i, nija telok ka nem Pegasus ken o bushidaksütsü akhangba temepishiba ken otem dak sendakba nung taruba hopta court-i telemtetba agitsü, ta metetdaksü.

Supreme Court Chief Justice, N V Ramana-i aniba bench-i, Pegasus ken o dak sendakba temepishiba atema tamalen sangdong agütsütsü liasü saka taruba hopta nung ang telemtetba agia sangdongtsü, ta metetdaksü.

September 13 nü iba ken o angadanga mapang nung Supreme Court-i, "Ozüng alema sensotem itangitsü atema Centre sorkari Pegasus spyware amshir asü mamshi, ibaji dang onoki metetner," ta metetdakja liasü.

SC-i Centre sorkar dang affidavit nung telangzüba agüjang ta tuyua liasü, ajisüaka Centre-i linük security nung ajemdaker affidavit nung osang tejangja agütsütsü makok, ta langzüba liasü.

Israel nung NSO indang

Pegasus amshia India nung tongtibang sensotem, yimten lenirtem aser osangbenertem phone ajanga itdangitogo, ta tai tonglokja aliba ken o bushisüngdangtsü atema Supreme Court nem temepishiba ken o kar agüja lir.

Pegasus ken o bushisüngdangtsü atema technical expert committee ka tentetba tajungba asütsü, ta Supreme Court-i jembiba atema tenüngsang agüja Brihostibarnü Congress-i, Supreme Court-i ketdangtsü iba ken o jungjunga bushisüngdangba tajungba asütsü, ta ashi.

Congress party otongdar tongti, Randeep Surjewala-i, "Pegasus ken o ya linük security kümzütsü onük ka masü saka Modi sorkari linük security aser nija ka temeden anema inyakba onük lir," ta metetdaksü.

"Tongmelang agi tajungtibangji-- SC-i ketdangtsü jungjunga bushisüngdangtsü. Iba atemaji "technical committee" ka tentettsüla ta Supreme

Court-i ashibaji kanga shidak," ta pai twitter ajanga metetdaksü.

Congress party otongdar, Supriya Shrinete-ia, osangbenertem report nung ajemdaker iba ken o bushisüngdangba ajanga linük security meraksatsü, ta ashi.

Laisa, itdangitdaksüba nisungtemji yimtenren nung opposition lenirtem dang masü saka linük tongti rejutem nung ketdangsertema densema lir, ta ashi.

"SC-i technical expert committee ka tentettsüla, ta jembibaji Congress-i pela agizüker, ajisüaka iba dang nungjagi tajungba bushisüngdangtsüla, aser yamaji asütsü ta ni imlar," ta lai ashi.

Centre sorkari, Pegasus ken o bushisüngdangtsü atema sorkari mongintemi akümba committee ka tentettsü ta tamalen metetdakja liasü aser Brihostibarnü Supreme Court-ia iba ken o bushisüngdangtsü atema court-i mongin committee ka tentetba tajungba asütsü, ta jembir.

## PM Modi-i September 27 nü PM-DHM mission tenzüksütsü

**New Delhi, Rongjui/September 23 (Agencies):** September 27, 2021 nü Ato kilonser, Narendra Modi-i linük tesem ajaklen Pradhan Mantri Digital Health Mission (PM-DHM) tenzüksütsü, ta Brihostibarnü Union Health Minister, Mansukh Mandaviya-i metetdaksü.

Iba mission kübok nüburtem

nem digital health ID balaka agütsütsü aser iba nungji nisungba indang health record ajak alitsü.

Union Health Minister-i twitter ajanga, "September 27 nü PM @NarendraModi-i linük tesem ajungalen Pradhan Mantri Digital Health Mission tenzüksütsü. Iba mission kübok nüburtem nem digital health ID

balaka agütsütsü, aser iba nungji nisungba indang health records ajak alitsü," ta metetdaksü.

Tamalen iba scheme dang National Digital Health Mission ta jaa liasü. India nung healthcare system tajungba akümsü nükjidong nung iba mission ajanga Universal Health Coverage nungiter, ta minister-isa metetdaksü.



September 23, 2021 nü New York nung India External Affairs Minister, Dr. S Jaishankar aser Japan Foreign Minister, Toshimitsu Motegi na G4 linüktem senden nung adenba noksa nung angur.

## Afghan nunger kiralongrar 40-i India telungi aittsü merangdar

**New Delhi, September 23 (Agencies):** Benjung mongpu atongtsü mapang ana nung lia Intelligence agency balalai, India nung kiralongratsü atema kiralongrar telok balalai linük telungi aittsü merangdar, ta metetdaksü.

Intelligence ketdangsertemi, Pakistan-i yarisema Afghanistan nunger kiralongrar 40 shi Line of Control (LoC) anasa kiralongrartem camp ka nung lir aser onoki Jammu & Kashmir police aser sepaitem danga tekümdangtsü osang metetdaksüogo, ta ashi.

Intelligence ketdangser kati, "Taliban teloki Afghanistan nung sorkar akümba sülen Pakistan nung amenoka aliba aser ISI-i pusemba kiralongrar teloktemi yarisema Afghanistan nung aliba kiralongrartem India telungi aittsü meranger," ta metetdaksü.

"Kiralongrar 40 shi Line of Control (LoC) anasa Pakistan kübok Nakyal sector nung aliba kiralongrartem camp ka nung lir ta agency balalai onok nem metetdaksüogo. Tubes aser tzü telung nung amshiba oset balala amshia Poonch ayong ajanga India telungi aittsü atema parnok nem training agütsüogo," ta paisa metetdaksü.

Intelligence agencies-i, India arrtsülen Lashkar-e-Taiba, Harkat ul-Ansar (HuA) aser Hizbul Mujahideen kiralongrartem senzüba osang jangjaogo, ta metetdaksü.

"Kiralongrartem jagi Tiffin bomb amshitsü meteta lir. India nung aliba sleeper cells-i bomb yanglutsü atema nungdakba oset parnok nem agütsütsü. Agencies, state police aser sepai ajak dang tekümdangtsü osang metetdaksüogo," ta paisa shisem.



September 23, 2021 nü Patna nung RJD lenir, Tejashwi Yadav-i osangbenertem den jembiba noksa nung angur.

## Narendra Giri asüba ken o nung UP police-i nisung asem puogo

**Lucknow, Rongjui/September 23 (Agencies):** Anogo ishika tejaklen Allahabad nung Akhil Bharatiya Akhara Parishad Tir, Mahant Narendra Giri asüba sülen iba ken o dak sendakba nung Uttar Pradesh police-i nisung asem puogo.

Osang angazükba agi, Bodhbarnü Uttar Pradesh state police-i nisung ka tenüng agi, Sandeep Tiwari puogo, ajisüaka iba dak sendakba nung George Town police station nung ketdangsertemi osang kecha memetdaksü.

Giri ya India nung sadhu tem indang organisation tulutiba-Akhil Bharatiya Akhara Parishad nung Tir teinyakdak liasü. Hombarnü Allahabad nung pa tsüngbang nungi lisü agi alenseta sür lia par nütüngtemi pa angu.

Bodhbarnü Mahant sülen anidaker/nütüng ana- Anand Giri aser Aadhya Prasad Tiwari na court kati anir ao aser tenaprong anogo 14 tashi judicial ket nung ayutsü.

Mahant asüba tatalokba bushisüngdangtsü atema Uttar

Pradesh Police-i züngsem 18-i akümba SIT tentetogo.

Pa asüba tesem anasaji soseta asüba shidi ka zülur liasü, aser shidi nungji Anand Giri-i pa dang pa tetsür ka den külemi tangokba noksa pai prokshitsü ta amokmerena liasü. Shidi nungjisa Mahant-i, "Tiyazü nung ni maaksü anguba dang nungibo kü taküm akhümketa asütsü," ta zülua lir.

Uttar Pradesh sorkari iba tatalokba ya CBI nem bushisüngdangdaksütsü atema benokogo, ta state home department-i metetdaksü.

Home department-i twitter ajanga, "UP Chief Minister Yogi Adityanath tetuyuba nung ajemdaker Mahant Narendra Giri asba tatalokba ya CBI (Central Bureau of Investigation) nem bushisüngdangdaksütsü atema benokogo," ta metetdaksü.

Mongolbarnü Allahabad nung osangbenertem den jembidang Yogi-i, Mahant asüba ken o bushisüngdangdar aser aibelenertem nem temerenshi tulu agütsütsü, ta metetdakja liasü.

## Sagaing region nung Myanmar mitkari nisung aliba ki nung mi asener



Myanmar nung aliba Chin State kübok Thantlang jila nung mitkartemi nisung aliba ki nung mi senloktsüba sülen tangokba noksa ka yangi angur. Iba lendong atalokba sülen yangji alir nisung meyirijang aika anasa aliba arütsü alema India nung jenoka lir. February ita Myanmar mitkartemi tashiyim amshia sorkar atsüngdokba sülen nüburtemi longkak ait tenzük aser opposition militia tentet.

**Naypyidaw, Rongjui/Sept. 23 (Agencies):** Myanmar kübok Sagaing Region nung sepaitemi nisung aliba ki rongdokja yangji alir dak injang khaloktsüba ajanga civilian tem pei yimtsüing yutsür jena aor.

The Irrawaddy news website ajanga Bhostibarnü ashiba agi, police tanishir ana aser par kibong tepseter anogo ka lir sorkar meyong sepaitemi Mandalay yimti northwest tsütsü Taze jila nung aliba yimtsüing ka rongdoktsü.

Social media nung noksa prokshiba nung, süngdong tema aliba tesem ka nungi mokozü tanak adoka liasü, aser The Irrawaddy ajanga ibai Kyikone Village lir ta jangjatsü. Iba lendong nung asü-amaba osangbo ano mangashi.

February ita mitkartemi Aung San Suu Kyi'er party-i aniba sorkar atsüngdokba sülen Myanmar nung rongrongshirong adoka arur, kechiaser linük tesem ajanga nung yisüsüba anema nokdakba mitkartemi nokdangtsü meranger.

India den arütsü anasa Chin state nung sorkar atsüngdokba anema nokdaker aser mitkar tsüngta rarar anogo ka lir Sagaing nung iba timtem ya ajurur alitsü.

Mitkartemi atsüngdoker aliba parliament züngsemtemi ita tetenzüklen "people's defensive war" sangdongba sülen mitkar dak tenük yoker amakba tali kumogo.

Iba ama lendong ya September 18, 2021 nü atalok, kong Thantlang, Chin nung aliba local defence group ka nungi züngsem 100 shi atsüka atar mitkar dak amakba, ta mitkar indang odongtar Zaw Min Thun-

i Mongulbarnü ashi saka pai nisung asü-amaba indangbo mashi.

Iba rara sülen mi adokba nung nisung aliba ki 20 aser sorkar meyong ki ka rongdok, ta pai ashi.

Honibarnü injang tulu aser bomb khaloktsüba sülen nisung meyirijang aika pei ki yutsür jena ao, ta The Irrawaddy ajanga Bodhbarnü ashi.

Hombarnü sepaitemi nisung aliba kidangi arur window nungi tapi agi injang khaloktsüba sülen nüburtem jila yutsür jena ao tenzük, ta yangji alir kati pa tenüing memetdaksüi osangbener dang ashi.

"Nisung ajak amai iba jila yutsür jena ogo aser nia anasa aliba yimtsüing ka nung dangar nisung 500 shi den külemi jenoka lir aser ano noklang aika India tsütsüi ogo," ta pai ashi.

Ano iba jila nung aliba tetsür kati ashiba agi, sepaitemi lar kidang bomb poklokja jila temeket nung rara tali akumba ajanga India bushia tsürabur anir asemnü jaja, ta ashi.

"Mitkartemi bomb poklokjaka ozü ki yutsür aotsü ni kodanga mebilem... saka tensa tamajungba akum, anungji ni jena aotsüsa akum," ta lai osangbener dang ashi.

Arütsü alema orr India kübok Mizoram state nung alirtemi ashiba agi, September 10, 2021 nü Chin nungi refugee 2,000 shi arua lir. Chin nung tesem kar nung mitkar meyong tayimtsü nungi bomb tsükdakja liasü, ta kari ashir.

Thingsai yimtsüing nung alir kati oshi meyipzüksür ajanga osangbener dang ashiba agi, September 10 nü arütsü alema orr prangbong aser bomb ola angashi. Ano yimdaklir kati

mitkar indang tayimtsü nungi bomb tsükdakja angu, ta ashi.

September 15 nü arütsü alema aoba refugee kati ashiba agi, Mizoram atongtsü atema pa bike ka nung anogo asem jaja. "Bomb pokloktsüba sülen onok kanga tsübur. Onok jena aotsüsa akum. Mitkartem den raratsü aser ozü nübur kumzüksü asoshi ozü tanur ana maru," ta iba nisungba yagi ashi.

Media balala nung video aser noksa prokshiba nung Thantlang nung aliba ki tem mitkartemi raksatsüogo aser yangji kiset shiruru senzür, ta parnoki ashi.

Mitkar tashi amshia sorkar atsüngdokba anemer temi tawa Chin densema linük tesem balala nung mitkar meyong Mytel indang communications tower tem raksaja liasü.

Iba region nung asendenshir raraba ajanga nisung talila India nung jenoka lir, aser parnok atema chiyongtsü aser talidak ki nüngdaker, ta United Nations ajanga ashir.

Chin southern tsütsü Mindat jila nungi yimtsüing anemertem aridoktsü mechi May ita sorkar meyong sepaitemi artillery amshia liasü aser mapang tatsüka lir water supply raksatsü, ta jangji aliba telungpur telok ka indang odongtari ashi.

Mitkartemi tashiyim amshia sorkar atsüngdokba sülen civilian 1,100 dak tema tepsetogo aser nisung 8,000 jungnüa puogo, ta ashir.

2020 kum tatemlen Aung San Suu Kyi'er National League for Democracy party ajanga takok anguba election nung ashikülak mapa inyakba mechi sorkar ya atsüngdok, ta mitkartemi ashir.

## Sri Lanka nung COVID aneptsüteter ta jembisang arasener COVID agi asü

**Colombo, Rongjui/Sept. 23 (Agencies):** Nüngtugu arasener ka, shibai Sri Lanka nung temoatsü tzü agi COVID-19 tashidak wara tembangtsütsü merang, pa iba virus yagi süogo ta par kinungeri ashi.

Arishi kum 48 tain Eliyantha White yagi linük ato kilonser densema saisaponger aser yimten yimsüsürtem temang anepalua aru, aser pai moatsüba tzü ya ayongtem nung inoktsüba sülen Sri Lanka aser kidanger India linük nung iba tashidak wara ya tembangtsü, ta pai November ita shia liasü.

Health Minister Pavithra Wanniarachchi-i iba mapa ya inyaksü mela, saka ita ana lir la dak COVID-19 tashidak ya mena aser mozü kidang intensive care unit (ICU) nung munga liasü.

Iba sülen la jenjang ajemtsü aser la indang portfolio agien saka la cabinet nung ali.

2010 kum India nunger cricket asayar mongin, Sachin Tendulkar-i yimjak nung pa temokok yirur aliba anepaluba atema pelaba sangdongba sülen alima ajungai White ya meteta akum. White-i yariba sülen pai South Africa den sayaba mapang one-day international nung mezüngbuba double century yanglutet, ta Sachin Tendulkar-i sangdonga

liasü. White-i 2010 kum AFP news agency den sensaksemba mapang pa arishi kum 12 asüba mapang nungi pa dak tashi balaka liasü, ta shia liasü.

Iba sülen India nunger cricket asayar Gautam Gambhir aser Ashish Nehra nungera yaria liasü, ta pai ashi.

Pai COVID-19 mozü agitsü memolung, ta White'er kinungertemi ashi.

Pa temang ya Colombo nung leper tuluba nung Bhostibarnü quarantine yimyatam amshia remogo.

White-i anepaluba yimten yimsüsürtem rongnung Ato Kilonser Mahinda Rajapaksa densema lir aser pai Twitter nung, "Pai tashidak balala nungi taneptsü ngudaktsüba aser pai inyaka yutsüba mapatem teti bilemtetsü," ta ashi.

Saka doctor temi White ya taila lir ta ashi aser Ayurveda physician temia pai ashiba magizüker. Pai kum 3,000 tejen Indian medical tradition nungi angazüka amshir, ta shia liasü.

Sri Lanka nung coronavirus agi nisung 12,000 dak tema süogo aser nisung million tesadang ka dak tali iba tashidak agi menepa lir.

Ajisüaka doctor temibo asür ya anasü agi timba alitsü, ta ashir.

## Nobel Science, Literature sempet takok angur linük nung agütsütsü

**Oslo, Rongjui/Sept. 23 (Agencies):** Nobel Prizes agütsüba tentet ajanga Bhostibarnü ashiba agi, COVID-19 tashidak wara mechi takum agi kümnabuba science aser literature nung takok angur nem iba sempet ya pei linük nung agütsütsü. Peace Prize koba akhi mapang nungi Norway nung agüja aru, iba atema telemtetba ano magi, ta ashir.

Nobel Committee ajanga takum Nobel Peace Prize sempet angur ya Oslo-i arudaktsütsü lenmang lapoka yua lir, ta ashi. Oslo nung iba sentong agitsü osang ya October ita tom tashinung sangdongtsü.

"Ajaki COVID-19 tashidak wara ya tatem kati arudaktsüner, saka ano metembang. Iba tashidak wara indang yimya mejangjaba aser linük balala nung senzüsempongtsü nung tenokdangba agütsüba mechi 2021 sempet angurtem nem medal aser diploma ya pei linük nung agütsütsü," ta Nobel Foundation indang Executive Director Vidar Helgesen-i sangdong ka nung ashi.

Takok angur ya October ita tetenzüklen sangdonger saka

sempet yabo December 10 nü Scandinavian yimtiba ana nung sentong tulu ayongzüka agütsür. Iba sempet tentetsang Alfred Nobel ya 1896 kum December 10 nü asü, aser kum shia iba anogo nung sentong ayongzüka sempet ya agüja arur.

Taoba küma tashidak wara mechi senzüsempongba nung tenokdangba agüja aliba yong science aser literature prize ya sempet angur linük nung agüja liasü. Science nung sempet ya medicine, chemistry aser physics nung lir.

2020 nung ama 2021 sentong nung digital aser physical temeyoktep alitsü, ta iba foundation ajanga ashi.

Nobel Prizes ya 1901 kum mezüngbuba agütsür takum agi kum 120 ajunger aser iba sempet angutsüpur tenüing ya October 4 aser 11 tsüngta sangdongtsü. Medicine ya Hombarnü sangdongtsü aser iba sülen tasüngji physics aser chemistry ya Bodhbarnü (October 6) sangdongtsü.

Ajaki yongya ataba literature aser peace prizes ya Bhostibar aser Hokulbar anogotem nung sangdongtsü aser iba sülen Hombarnü economics prize sangdongtsü.



Chaman, Pakistan nung aliba border crossing ka ajanga Afghanistan refugee tem aitba mapang khubener kati tanur ana anir aruba noksa nung angur. August 15 nü Taliban teloki Afghan sorkar atsüngdokba sülen September 22 tashinung Afghan nunger nisung 35,400 shi Iran, Pakistan aser Tajikistan nung refugee kumer lir, ta UN High Commissioner for Refugee ajanga sangdong ka nung ashi.



*Dibuia Baptist Arogo aser Dibuia Compound Baptist Arogo longjemer yimer litsü nung tzükong lenmang kanga mejungi raksar alibatem anabenbuba yangluogo. Iba lenmang yanglushidang nübu jenti den JCB ka, Dumper ka amshia yanglu. Kasa mapa 2020 kum Christmas jakdanga anogo ananü tashi JCB aser garitem amshia nübu jenti endoka yanglua liasü.*

## Security Forces-i Mimi yimtsüng nung senden ka ayongzük

**Kiphire, Rongjui/September 23, 2021 (TYO):** Aruya aliba AR Recruitment Rally sentong ajungkettüsü aser security dak sendakba tebilemsü nung longjemer inyaksü atema, Bodhbarnü (22.09.2021) Mimi village Council Hall, Kiphire District nung HQ IGAR (North) kübok Kiphire Battalion - Assam Rifles-i Mimi Circle den senden ka ayonga agiogo, ta sangdong ajanga metetdaksü.

Security dak sendakba nung, ajaki amalitepa inyaksü mechi sensaksem akatsü aser Mimi Circle kübok yimtsüng 8 nung yimtsü-yimer tem dang aruya aliba Assam

Rifles technical aser tradesmen recruitment rally nung lanurtem ajungshia shilem agidaktsüsü nükjidong nung iba senden agia liasü.

Iba senden nung, Assam Rifles-i technical aser tradesmen recruitment rally atema, temsüa alir (eligibility) aser selection criteria indang nung telok sensaksemogo. Iba rally atema tetuyuba tem talisa document, age limit, online registration inyakyim aser trade balala nung vacancy osang aliba pamphlet tem telok nem lema agütsüogo.

Iba senden nung, Mimi, Betang, Khaha, Khongka,

Hakkomute, Mutingkhong, Lopfukhong aser Khongjiri yimtsüng indang GBs, VCCs, VDB Secretary tem densema Mimi Circle indang züngsem 34 agi shilem agiogo.

Maneni, iba rally dak sendakba nung temsüa alir candidate atema Assam Rifles-isa online form inyakyimtem tsütsü yaritsü asoshi yimertem dang nangzükogo. Yimdak-yimtsüng nung alirtem asoshi bilemja aser tesendaktep tajungba yanglutsü mechi, iba senden takok ngua agiba atema Mimi Circle züngsemtemi Assam Rifles dang pelaba metetdaksü, ta kasa sangdong nung shia lir.

## TENÜNGSANG AGÜTSÜR

UNGMA Imlang Imsonger IMTISOSANG SEMCHIR-i teküboklen agüja aliba jala nem pei wadang kaket shisatsü bushiba nungi takok tulu ngua kinunger nem konang tetushi tulu bener arutsü nung kinunger-i la nem tenüngsang tulu agütsür.

**Wt. IMWAPANGLA IMSONG** D/o. I. ALEMPOKBA IMSONG-I Topic: **"Contour of Ecofiction: Canon and beyond"** iba dak ajemdaker züluba nung temtetta, Department of English, Nagaland University Meriema: Kohima nungi Ph.D degree ngutet.

Tsüngremi la taküm aser maparen ajak nung maneni len ania moajangma ta kinunger sarasadem.

### Kinunger Tenüngsang,

1. Alemtoshi Imsong, Tatar
2. Alingangshi Imsong, Tatar
3. Mangyangnuken Imsong, Tatar
4. Tamjenchuba Imsong, G.B

## Security Forces-i teyari agütsü

**Phek, Rongjui/September 23, 2021 (TYO):** Mongolbarnü (21.09.2021), HQ IGAR (North) kübok Asaam Rifles indang Phek Battalion-i Ziphu, Phek District tesem nung gari (Maruti Suzuki Alto) ka, koba tarok kati yir liasü, iba gari atsütettsü asoshi teyari agütsü, ta sangdong ajanga metetdaksü.

Iba gari nung nisung pezü

mener liasü aser parnok ajak terara yiruba dak alaka, zübo tulu keta mesüra kanga mejungi yirubabo mali. Iba osang angazükli dang, Battalion indang JCB ka yok aser iba gari atsütetta liasü.

Nübur timtem nung aliba ajiteta teyari agütsüba asoshi yimertemi Phek Battalion indang Assam Rifles dang pelaba metetdaksü, ta kasa sangdong nung shia lir.

## GOVERNMENT OF NAGALAND DIRECTORATE OF SCHOOL EDUCATION NAGALAND :: KOHIMA NOTIFICATION

Dated, Kohima, the 22nd Sept. '2021

NO.ED/EL/C/2/MON/2017-18:: In continuation to this office Advertisement NO.ED/EL/2/MON/2017-18 Dated 24-08-2021, it is hereby notified for information to all the candidates who have appeared the written examination for 1(One) post of Primary Teacher at GPS TotokChingnyu A under SDEO Mon held on 10-09-2021 at DR. NEILHOUZHU GHSS Seikhazou, Kohima that the candidates with the following roll numbers have qualified for the Viva-Voce: 03, 14, 29, 36 & 47.

2. The Viva-Voce shall be held on 27-09-2021 at Directorate of School Education, Kohima from 10:00 am onwards.
3. All the concerned candidates shall report for Viva-Voce at 09:30 am along with all relevant educational documents in original.

(SHANAVAS C) IAS  
Principal Director

### EXPORTERS CONCLAVE

Theme: Showcasing Exportable products and services in district

Date : 25th September, 2021

Venue : Conference Hall, Directorate of Industries & Commerce, Nagaland Kohima.

### PROGRAMME

### SPECIAL GUEST

SMT: N BHAVANI SRI (IAS) Additional Deputy Commissioner, Kohima

### Inaugural Session

Chairman: Shri Intsangjuser Functional Manager, Tseminyu

10:00 AM Arrival of Special Guest followed by National Anthem

10:10 AM Welcome Address **Shri. Vitsutho Nyuthe**  
Additional Director, Industries & Commerce

10:20 AM Keynote Address **Er. Y. Lipongse Thongtsar**  
Joint Director, Industries & Commerce

10:30 AM Introduction to Azadi Ka Amrit Mahotsav

10:40 AM Address by the Special Guest **Shri. Sukhnonal Langthasa**  
General Manager, DIC Kohima

11:00 AM Vote of thanks

11:15 AM Inauguration of Exhibition Stalls by Special Guest

Lunch

### Knowledge Sharing Session

Moderator: Er Keneirenuo Kire, Asst. Director of Industries

12:00 Noon District as Export Hub initiative **Shri. Sukhnonal Langthasa**  
General Manager, DIC Kohima

12:10 PM Focus on Products/Service identified from the District **Shri. S. Senka**  
District Horticulture Officer, Kohima

12:25 PM How to become an Exporter **Dr. Archuna Nath**  
Sr. Consultant APEDA, Guwahati

01:00 PM Focus on local Industries and their potential **Shri. Sourabh Trivedi**  
Marketing Director, Produce of Naga Hill

01:25 PM Panel of discussion: issues faced by exporters

01:50 PM Closing Remark Moderator



*Longchem - Naganijan lenmang kanga majungba agi nüburtem timtem ngua Longchem, Aonokpu, Nokpu, Saring yim pezü sanger lungjemer angati nübu tsüka lenmang yanglushiba mapang tangokba noksa nung angur. Iba lenmang ya talisa Japukong nunger asoshi taküm lenmang lir, saka aiben department-i iba lenmang zütokba ajanga nüburtem kanga timtemteper, ya junga yanglu nungbo Mokokchung district lenmang aisü nung tajangzük angutsü imlar, ta yangji alir senso kati iba osangbener den jembidang metetdaksü. Mokokchung, 22nd September, 2021 (Photo Courtesy: I Meren Walling).*

## League Cup: Chelsea-i Aston Villa kokogo



Chelsea asayartem penalty nung takok ngur pelatepba noksa nung angur.

**London, Rongjui/September 23, 2021 (Agencies):** Bodhbarnü, Stamford Bridge nung Chelsea aser Aston Villa na League Cup asaya draw - goal 1-1 nung tembangba sülen, penalty metsütepba nung Chelsea-i goal 4-3 agi Aston Villa tsükdakja iba League indang pezübuba round-i iogo.

Iba League asaya tanga ka nung, West Ham puri goal 1-0 agi Manchester United tsükdaktsüogo. Deobarnü, Premier League nung tamakok ngur (Man United-i goal 2-1 agi West Ham tsükdaktsü) sülen, Old Trafford kübok iba League asaya nung West Ham puri Manchester United madak takok ngua liasü, kong asaya tetenzüklen Manuel Lanzini-i minute 9buba nung goal ka idaktsü.

Chelsea manager Thomas Tuchel-i team nung asayar 10 tashi melena asayadakja liasü aser mezüing half tashi telok kati danga goal meinoktsüteti tembangba sülen, tanabuba half nung, Germany nung striker Werner-i minute 54buba nung Chelsea atema goal ka idaktsü. Reece James ajanga metsüketa yokba cross ball ka Werner kolak agi tongokja Villa keeper Jed Steer adena iba goal idakja liasü.

Tatsüka dang lir, Villa atema Cameron Archer-i minute 64buba nung goal ka idaktsüba

sülen, team anaprongla goal 1-1 nung tembang.

Iba League Cup pezübuba round nung Chelsea-i Southampton den asayatsü.

Manchester United-i taoba manager David Moyes agienba sülen küm tenet lir, West Ham manager ka ama Old Trafford nung pai mezüing takok angur asütsü.

Pezübuba round tanga ka nung, West Ham-i Manchester City den asayatsü. Manchester City-i taoba League Cup final pezüben tashi koka lir. 1980 FA Cup asayar külen nungi London club West Ham-i mezüing domestic trophy takok angutsü asoshi meranga asayadar.

Deobarnü, Premier League nung shilem agir Manchester United asayar timbaka iba League Cup nung masaya. League Cup nung Cristiano Ronaldo-ia shilem magi.

Tang, United aser Liverpool na point timba agi tejkdang ser asayadar. Liverpool-i taruba League Cup nung Preston den asayatsü.

Round tasembuba asaya tanga ka nung, Arsenal-i goal 3-0 agi AFC Wimbledon tsükdaktsüba sülen, taruba round nung parnoki Leeds den asayatsü. Iba asaya tenzükler Alexandre Lacazette-i minute 11buba nung Arsenal atema penalty ka idaktsü. Tanabuba

half atemtsü minute 13 anünga lia, Arsenal atema substitute Emile Smith Rowe aser Eddie Nketiah nati goal tanabuba aser tasembuba idaktsü.

Maneni, asaya tanga ka nung, Tottenham-i penalty nung Wolverhampton madak 3-2 agi takok anguba sülen, taruba round nung parnoki Premier League team - Burnley den asayatsü.

Iba asaya nung, Tottenham atema Harry Kane aser Tanguy Ndombele nati goal ka ka idaktsü; aser Wolves atema Leander Dendoncker aser Daniel Podence nati goal ka ka idaktsüba sülen asaya draw nung tembang.

Ajisüaka, penalty metsütepba mapang, Wolves nungi Ruben Neves, Dendoncker aser Conor Coady nungeri shit metsüpetba ajanga Tottenham puri goal 3-2 agi iba asaya koktet.

Ano, Leicester-i goal 2-0 agi Millwall kokogo. Iba asaya mezüing half tashi goal ka danga meinoktsütetti tembangba sülen, tanabuba half nung, Ademola Lookman-i minute 50buba nung Leicester atema goal ka idaktsü. Asaya atemtsü lia, Iheanacho-i Leicester atema goal tanabuba bendenlokja liasü. Taruba round nung Leicester aser Brighton na asayatsü.

## Indian Wells nung Naomi masayatsü

**New Delhi, Rongjui/September 23, 2021 (Agencies):** Taruba ita nungi tenzükla asayatsü aliba BNP Paribas Open - Indian Wells nung, Japan tsür Naomi Osaka-i shilem magitsü osang sangdongogo.

September ita tetenzüklen, US Open nung tamakok anguba sülen, Osaka-i tennis asaya nungi khen anena atatsü asoshi osang metetdakja liasü. Taküm küm indang tatemububa major asayamung - US Open nung, Grand Slam pezüben takok angula, Naomi Osaka tasembuba round nung tsükadok. Iba sülen, lai, tebilemstü balala aliba ajanga mapang agia anisüingzüktsü nüngdaker ta osangbener dang ashi.

May nung French Open nungi Osaka-i shilem magitsü osang sangdonger külen nungi, tennis asaya tsütsü la timtema arudar. Arishi küm 23 tain Osaka-i 2018 küm Indian Wells nung WTA title mezüing takok angu.

"2022 küm tennis asayamung nung Osaka-i tanaben shilem agitsü imlaa atar," ta Twitter ajanga asayamung ayongertemi lemsatop.

"Tanaben tennis asaya



tenzüktsü asoshi ni osang tejangja ka magütsütettsü. Mapang tatsüka atema iba asaya nungi anena atatsü ta bilemdar," ta Osaka-i ashi.

Cincinnati Open nung Osaka tamakok ngur sülen, Tokyo Olympics mezüing round nung la tsükadok.

Taoba mapang World no 1 nung alila Osaka, WTA ranking top five nungi aluogo aser la tang rank 8 nung lir.

Osaka, shiba Japan nung aso aser tang US nung alir, lai asayamung ketdangsürtemi renemba temzüing nung manidakba ajanga, May ita French Open nungi tukadoker külen nungi court nung junga masayateti arudar.

Asayar ajaki osangbener (media) den jembitsü asoshi asayamung ketdangsürtemi temzüing renema lir aser iba tetuyuba nung anidaktsü Osaka-i memolunger.

## Andy Murray quarter final-i iogo

### MOSELLE OPEN

**Metz (France), Rongjui/September 23, 2021 (Agencies):** Tang asaya aliba Moselle Open tennis asayamung tebur kija round of 16 asaya nung, taoba mapang world no. 1 Andy Murray-i Canada nung Vasek Pospisil madak takok anguba sülen, pa quarter final tongogo. Küm ana nung, Murray-i ATP quarter-final mezüing tongtetter asütsü.

Murray, shiba tang rank 113buba nung lir, iba asaya nung pai 6-3, 6-3 agi Vasek tsükdaktsü. Semi final tongtettsü atema, pai Poland nung top seed Hubert Hurkacz den quarter final asayatsü.

Kasa asayamung tebur kija round of 16 asaya tanga ka nung, Hurkacz-i 6-2, 6-3 agi France nung Pouille tsükdaktsü.

2019 küm October ita Antwerp nung Murray-i 46buba career title takok ngur külen nungi, pai last eight nung mezüing shilem agiba angutsü.

Arishi küm 34 tain Britain

nung Murray, shiba 2018 aser 2019 küm tepi surgery agia liasü, pai major title asem den külemi London aser Rio de Janeiro nung anaben tashi atonga Olympic gold medal (singles) nguogo.

"Tan season nungang asayamung timbaka nung ni shilem agidar aser match balala nung shilem agia arudang, asaya yimya tajungba melenshia aser maneni junga asayatettsü ama ni bilemer," ta ATP 250 nung Murray-i ashi. "Asaya mapang points angudang pelar aser ni aginüba ama tanaben iba asaya nung shilem agitetba ngua jangratemer; aser iba ya ni asoshi kanga dang tulu," ta pai ashi.

Taküm Wimbledon asayamung nung, Murray-i tasembuba round tashi tongteta asayaogo aser US Open nung mezüing round nung seed tasembuba Greek nung Stefanos Tsitsipas den set pungo tashi meranga toktep, saka pai iba asaya makok.

## ICC-i T20 World Cup indang anthem sayaogo

**Dubai, Rongjui/September 23, 2021 (Agencies):** Brehostibarnü, ICC-i aruya aliba T20 World Cup indang naklo ken (anthem) den külemi Indian batting maestro Virat Kohli aser West Indies skipper Kieron Pollard na indang 'avatar' dena aliba campaign film ka sayaogo.

Iba asayamung Oman aser UAE nung October 17, 2021 nungi tenzüktsü aser November 14, 2021 nü Dubai nung final asayatsü.

Bollywood music director Amit Trivedi-i mejemba T20 World Cup anthem nung, alima tesem ajunga nungi T20I cricket tsütsü sendaktepa alir fans tem aser iba asaya nung tongtibang asayartemi shilem agiogo.

Iba animation film nung, India captain, Kohli-i asayar telok anir parnok tsüingda

sensaksemba sayur. Kohli den taoba T20 World Cup takok angur team captain Pollard (West Indies) den Australia nungi all-rounder Glenn Maxwell aser Afghanistan nungi Rashid Khan nung iba ken nung tangoka lir.

ICC indang global broadcast partner Star Sports den longjemer sayaba film ya Brehostibarnü, alima ajunga nung ICC, BCCI, aser Star Sports meyong social media sabang ajanga sayuogo. Iba animation nungsa broadcast technology tasen angutsü, kong iba film yanglutsü asoshi 3D aser 2D effects meyoktepa amshiogo.

Iba animation indang final version yanglutsü asoshi, designer, model, matte painter, animator, lighter aser composi-

tor densema production team nung nisung 40 dak tema inyakogo.

Covid-19 tensa liaka, iba asayamung nung linük 16 agi shilem agitsü terenemba lir.

"West Indies jersey semoker iba asayamung nung shilem agitsü maongka anguba asoshi pelar," ta Pollard-i ashi.

"Aruya aliba World Cup ya onok asoshi mapang tajung ka asütsü. Alima tesem ajunga nung fans tem tali dang atsüa arutsü asoshi onoki tajungtiba nung shilem agitsü renemdar," ta pai shisem.

October 17, 2021 nü iba asayamung tenzüktsü, kong T20 World Cup nung mezüing shilem agir team ana - Papua New Guinea aser Oman na tsüingda Muscat indang Oman Cricket Academy nung mezüing asayatsü.

## BILEMDANGANG

"Tashi agi masü saka shiametet agi tongbangji akoker."